

Inatsisartunut aalajangigassatut siunnersuut Naalakkersuisut peqquneqassasut inatsimmik pilersitseqqullugit, angajoqqaq/oqartussaassusermik tigummiartooq meeqqamut ataatsimik arlalinnilluunniit innarluuteqartumut imaluunniit arlalinnik innarluuteqartumut akissarsiatigut taarsiivigineqarnissamik, pineqartoq meeqqap innarluuteqarnerata malitsigisaanik sivikinnerusumik suliguni. Tamanna pissaaq meerarisaq angerlarsimaffimmi najugaqartoq qassinilluunniit ukioqaraluarpat.

(Inatsisartunut Ilaasorta, Anna Wangenheim, Demokraatit)

Akissuteqaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisooq)

Siullermeerneqarnera

Siunnersuuteqartumut, Anna Wangenheim-imut qujanaq.

Innuttaasugut immikkut pisariaqartitallit taakkunungalu qanigisaasut, inuiaqatigiittut peqataatitsisutut isumaginissaat akisussaaffigaarput. Ulluinnaat ilungersunarsinnaasut qanigisaasunut nukissanik atuinarsinnaavoq.

Inunnut innarluutilinnut qanigisaasorpasuit immikkut unammilligassaqartut aamma ikiorneqarnerunissamik tapersorneqarnerunissamillu kissaateqartut Naalakkersuisut eqqumaffigaat. Ilaatigut oqilisaassinissamut periarfissat pitsaanagerusut pillugu kissaateqarneq saqqummiunneqarsimavoq. Oqilisaanneqarnissamut periarfissanik pitsaanagerusunik kissaateqarneq aamma aningaasaqarnikkut tapiisuteqarneq qitiutillugu qanigisamik paarsaqartarnissaq Naalakkersuisunit tusaatissatut tiguneqarpoq.

Inuit innarluutillit taakkualu ilaqutaannut pissutsinut pitsanngoriaatinik arlalinnik imaqaartussamik, 2024-mi ukiakkut Inatsisartut ataatsimiinnissaannut saqqummiunneqartussamik, inuit innarluutillit tapersorneqarnissaannut inatsisissatut siunnersuumik nutaamik Naalakkersuisut piareersaapput.

Qanigisaasoq suliffeqarfeqarfimmut atassutilik, qanigisaasup innarluutillip angerlarsimaffimmi paarinissaanut kommunimit atorfinitsinneqarsinnaaneranut siunnersuutip periarfississavaa. Ilaquttaminnik innarluutilimmik tapersersuinissamut tunngatillugu qanigisaasut isumalluutitut pingaarutilittut naleqartutullu Naalakkersuisunit isigineqarput. Ilaquttaminnik innarluutilimmik tapersersuinissamut tunngatillugu qanigisaasut isumalluutitut pingaarutilittut naleqartutullu Naalakkersuisunit isigineqarput. Taamaattumik qanigisaasunik aamma tapersersuinissarput inissaminiippoq. Ilaqutariit pineqartut ulluinnarnik toqqissisimanartunik naleqartunillu ataatsimoorluta tunitigit.

Naalakkersuisut taamatut oqaaseqarlutik siunnersuut itigartinneqassasoq inassutigaat.